


Fusa Sogn 2025

Årsmelding



A. Innleiing

"Menighetsrådet skal ha sin oppmerksomhet henvendt på alt som kan gjøres for å vekke og nære det kristelige liv i soknet, særlig at Guds ord kan bli rikelig forkynt, syke og døende betjent med det, døpte gis dåpsopplæring, barn og unge samlet om gode formål og legemlig og åndelig nød avhjulpet".

«Ordning for Den norske kyrkja» sin § 12

Det er dette det Fusa sokneråd skal ha fokus på i sitt arbeid. Soknerådet handsamar saker og peikar ut satsings-områder og strategiar, og dei tilsette – staben – leier arbeidet og utfører det i lag med alle i kyrkjelyden. Breidda av arbeidet var også i 2025 godt, og i tillegg kom soknet dette året i gang med arbeid med ny strategiplan.

B. Gudstenester

Gudstenestene skal vera pulsslaget i kyrkjelyden!

Lat oss ikkje halda oss borte når forsamlinga vår kjem saman, som nokre har for vane, men lat oss setja mot i kvarandre..... (Hebrearane 10.25)



Familiemix på Eikelandssosen bedehus advent 2025.

2024 var det til saman 83 gudstenester og det var totalt 5484 til stades på gudstenestene, ein nedgang på 4% frå 2024, med same tal gudstenester. Gjennomsnittstalet pr gudsteneste var om lag 66 deltakarar og talet på nattverdsgjester var 1316. Det er nedgang frå høvesvis 69 og 1532 året før.

Oppgangen dei par siste åra har i 2025 altså stoppa litt opp, men deltakinga på t.d. julaften, «folkekyrkjedagen», har hatt god auke både i 2024 og 2025.

Ein del lekmannsgudstenester vart haldne av frivillige medarbeidarane, både gudstenesteleiing og forkyning. Tendensen som syner at gudstenestene på Eikelandssosen bedehus er dei best besøkte gudstenestene ser ut til å halda fram i 2025.



Lillian og Astrid formidlar på Julaften i Sævareid.

C. Trusopplæring

Trusopplæring har vore eit satsingsområde gjennom mange år og fokus-området har vore 0-18 år. No omfattar trusopplæring det meste me gjer for alle aldrar; «0-100 år».

Tradisjonelt har me delt mellom kontinuerlege tiltak som er t.d. søndagsskule, kor m.m og breiddetiltak i trusopplæringa. No blir det mindre og mindre skilje på desse kategoriane og alt arbeidet som skjer i soknet blir no rapportert i den nye portalen «kyrkja vår». Likevel tenkjer me framleis på tiltak for dei mellom 0-18 år når me snakkar om trusopplæring i Fusa. Det er bra oppslutning om trusopplæringsarbeidet i Fusa, men oppslutninga har dalt jamt og me kjem nærmare landsgjennomsnittet. Det er ei stor oppgåve å skape medvit hos foreldra om at dåp og opplæring høyrer uløysleg saman, slik at deltaking i trusopplæringa kan verta normalisert for alle døyppte.

I 2025 har me hatt full bemanning på trusopplæringsstillingane, 1,7 stillingar. Dette har gjort at fleire tiltak har vorte gjennomførte og at fokuset på desse har vore godt, med bra oppslutning. Samstundes er årskulla i Fusa-bygdene små no. Ein har difor slått saman fleire breiddetiltak og fleire årsklassar i tiltaka for å få samla litt større mengde barn på tiltaka.

Alle døypte barn i Fusa får i dåpssamtalen ein lokalt tilpassa **dåpsperm og CD** med lokale song- og musikk-krefter.

Musikk frå livets begynnelse/Babysang (0-2 år) vart gjennomført både på våren og om hausten. Fødselstalet i Fusa i 2025 er ein del betre enn dei siste åra og oppslutninga er høveleg god.

3 år – 3-års adventssamling på E.osen bedehus med godt oppmøte.

4 år – Utdeling av Bibelbok i tilpassa gudstenester rundt om i bygdene.

5 og 6 år – Dåpsskule annakvart år, ikkje 2025.

10,11 og 12 år – Tweens-spesial på Eikelandssosen bedehus i adventstida.

Konfirmantåret – eit omfattande tilbod til alle 14-åringane. 35 ungdommar vart konfirmerte i mai 2025, og 46 starta på nytt konfirmantår i august.

Alle som har **eit års dåpsdag** får tilsendt «God-natt»-plakat og **to års dåpsdag** spisebrikke.

Av kontinuerlige tilbod i 2025 kan nemnast:

KLUBBEN for tweens 5.-8.klasse har blitt ein god samlingsplass med bra oppmøte og jamt trøkk. Ein ser her at dette tiltaket også treff ungdommar heilt opp til 10. klasse Eit viktig tiltak som har blitt jobba godt med av tilsette og frivillige.

Fjordn`n barnekor hadde bra oppslutnad i vårsemseteret, rundt 20 barn, og vart avslutta med ein flott konsert for fullt bedehus, med eige band og Bjarte Leithaug. Haustsemesteret

vart eit prosjekt på 4 øvingar fram mot opptreden på Minglemiddag under bispevisitasen 11. nov. Litt få og lit små barn denne hausten.

NOAH, friluftsklubben for gitar 5.-8. klasse, har i mange år hatt flinke og dedikerte leiarar og bra oppmøte av deltakarar. Eit strålende tiltak som har betydd mykje for ein heil del gitar i mange år. 2025 var eit godt år og tal deltakarar jamt godt. Ein flott gjeng ungar/ungdomar og flinke vaksne møtest jamnleg til mange spanande aktivitetar.



NOAH på Klenaneset i Hålandsdalen

D. Diakoni

Diakoni er kyrkja si omsorg for medmenneske. Fordi Gud har elska oss først.

Diakoni-arbeidet spenner over heile arbeidsfeltet til soknet, inn i alt me gjer. Fusa frivilligsentral, som soknet eig, vart starta opp som ein del av soknet si diakonale teneste.

Matgåve-Matglede: Samarbeid mellom kyrkja, frivilligsentralen, Nav, Fjord`n Senter/lokalt næringsliv:

Meir enn 40 matposar med julemat vart delte ut til personar og familiar som hadde meldt behov. Behovet var stort også i 2025, og utan store pengegåver frå næringslivet hadde me ikkje klart aksjonen. I 2025 valde ein å leggja seg på same nivå i størrelse på posane som ein gjer på Os, noko som har ført til mindre mat i posane og meir bruk av gåvekort. Samstundes er det meir samsvar mellom tilgjengelege midlar og forbruk.

I samband med minnegudsteneste delte **Diakoniutvalet** i kyrkjelyden ut lys og helsing til pårørende etter dødsfall siste året. Diakoniutvalet og tilsette har i lag med Frivilligsentralen eit tilbod om **Sorggruppe**. Dette starta opp i 2023 og har vorte eit eit godt og etterlengta tilbod.

Gjennom gravferd og elles ved dødsfall vert det utført diakoni, men det meste av diakonien er uorganisert gjennom einskildmenneske som stiller opp for andre. Dette skjer gjennom alt arbeidet i soknet, men særskilt gjennom frivilligsentralen sitt arbeid og gjennom barne- og ungdomsarbeidet. Frivilligsentralen har eiga årsmelding som syner deira store breiddeengasjement. Ein vil her også nemne Foreininga Bruktbuo og arbeidet som spring ut derifrå, det er viktig nettverksbygging. Bruktbuo flytta i 2025 inn i nye flotte lokaler på Fjord'n Nærseier. Overskottet frå drifta der kjem både brannskadde born i Etiopia og soknet sitt barne- og ungdomsarbeidet lokalt til gode.

Naudhjelp – Det mest kjende er den årlege fasteaksjonen til **Kirkens Nødhjelp**, som i 2025 gav vel 55 000,- kr.

Institusjonstenester - Det vart gjennomført 56 institusjonsandaktar og mange besøk til enkeltpersonar på institusjonane.

Vigsel. Det var 13 vigslar i 2025.

Dåp. 30 barn vart døypt i Fusa sokn i 2025

Gravferd. Det var 29 kyrkjelege gravferder i 2025.



11 av 13 vigslar i 2025 var i Hålandsdal kyrkje.

E. Misjon

Frå sommaren 2016 har Fusa sokneråd også engasjert seg i arbeidet for å hjelpe brannskadde born i Etiopia – gjennom **Children Burn & Wound Care Foundation** (CBWCF) og dr Einar Eriksen sitt arbeid. I 2024 hadde soknet ikkje storaksjon, men det har likevel jamt kome gåver til dette føremålet. Det er stort engasjement for dette, m.a. hos gjengen i Bruktbuo.

Frå 2012 har me hatt eitt, samla misjonsprosjekt i Fusa – elevstipend til studentar ved **Tabor utdanningssenter** i Hawassa i Etiopia. Dette gir ungdom som elles ikkje ville hatt høve til det – eit Bibelskule- og utdanningstilbod. Frå 2016 har Fusa kyrkjelyd dessutan teke på seg å finansiera skulepengane til to studentar ved Tabor Utdanningssenter. Det vart samla inn om lag kr.24.000,- til elevar og studentar i 2025. (kr. 36198,- i 2024, kr. 35290,- i 2023, kr. 30949,- i 2022, kr. 26399,- i 2021, kr.15.094,- i 2020 og kr.28.500,- i 2019).

F. Anna kyrkjelydsarbeid

Bispevisitas

Tysdag 11. november var biskop Ragnhild Jepsen på vitjing i Fusa sokn, som ein del av visitasen til Bjørnafjorden 11.-13. nov. 2025. Hos oss fekk ho ha møter med tilsette, sokneråd og fellesråd, delta på Minglemiddag i Eikelandsosen bedehus og kveldsbøn i Fusa kyrkje, vitja Frivilligsentralen og Bruktbuo samt vera med på Bibelsporet med

5.klassingane på Eikelandsosen skule. Ein innhaldsrik dag for både biskop og sokn! Visitasen til Bjørnafjorden vart avslutta med visitasgudsteneste i Os kyrkje søndag 23. november.



Biskopen i møte med alle tilsette og råda.

Forbønsteneste – Fusa sokn har eigen bønekontakt som enkeltmenneske kan ta direkte kontakt med for forbøn. Bønekontakten har eit bønenettverk som blir involvert når enkeltmenneske ønskjer det. Sjølv sagt kan ein også ta kontakt med prest eller andre i kyrkjelyden som ein har tillit til – om det er ønskje om forbøn. Forbønstenesta er aktiv.

Det er **faste bønensamlingar** annankvar onsdag frå kl 17.30 til 18.00 på forskjellige stader i kommunen; Foer bedehus, Nordtveit bedehus, Eikelandsosen bedehus og i Hålandsdalen kyrkje. Viktige samlingar der ein regelmessig ber for og velsignar det som skjer i dei forskjellige bygdene.

I slutten av august arrangerte soknet **Bønehelg**, ei inspirasjonshelg for bønearbeidet. Osvald Hindenes var med heile helga, som hadde samlingar i Eikelandsosen bedehus fredag og laurdag og gudsteneste i Sævareid kapell søndag.

Nokre onsdagar i semesteret arrangerer soknet **Bibel, Bøn og Lovsong**. Dette har lang tradisjon hos oss, og med andakt, lovsong og bønvandring i litt meir uformell setting enn gudstenestene er, er dette gode samlingar med god deltaking.

Bibel- og samtalegrupper – der er nokre bøn- og samtalegrupper i sving i kyrkjelyden. Desse er ikkje organiserte av sokneprest/stab.

Open kyrkje vert skipa til av Strandvik kyrkjeutval og tilsette den tredje tysdagen i nesten kvar månad i Strandvik kyrkje. Den timen kyrkja er open kan ein kome og gå slik det passar, sitje ned og høyre musikk og song frå lokale aktørar, tenne lys o.l.

Kyrkjemusikk 2025 Ved ein del gudstenester hadde kantor ansvar for innslag av lokale kor eller solistar. **Kyrkjekoret** var med på nokre av dei. Koret «**Sine Nomine**», også leia av kantor, deltek òg på gudstenester m.m.

Elles vart det m.a. arrangert tradisjonell julekonsert i Strandvik kyrkje, 5 jazz/vise-konsertar i Hålandsdal kyrkje (Baker Hansen, Magnolia Jazzband, Sigrid Moldestad, Hot Club de Norvegue, Sandven Jazzensemble), Bergen Domkor i Strandvik kyrkje og Walking Fields i Hålandsdal kyrkje. Soknet arrangerte òg familiekonsert på Eikelandsosen bedehus med Bjarte Leithaug og **Fjord'n barnekor** samt julekonsert i Fusa kyrkje med Atle Pettersen og **lokalt prosjektkor**.



Fullsett Fusa kyrkje under konserten med Atle Pettersen og lokalt prosjektkor

Informasjon

Fusa kyrkjeblad vart gitt ut 4 gongar i 2025. Ein er også bevisst bruken av lokalmedia med annonsering og informasjon. Kyrkjelyden er aktiv på Facebook, - søk opp Fusa sokn. Soknet

har også bygd opp ein base der ein sender ut SMS 1-2 gongar pr veke. Der er om lag 170 mottakarar av slik SMS. Fusa sokn har og ei nettside på Den norske kyrkja sin plattform. Søk på: www.kyrkja.no/fusa.

G. Samarbeid skule, barnehage og kyrkje

Soknet har pr. no ikkje eigen samarbeidsplan med kommunen for dette området. Dette arbeidet har stoppa opp p.g.a. prioriteringar hos kommunen.

I Fusa sokn tilbyr me likevel tiltak til skular og barnehagar, alt etter sesong og vår kapasitet, slik me har lang tradisjon for.

Kyrkjelydspedagogen hadde våren 2025 påskeopplegg med besøk i alle seks barnehagane og juleopplegg i alle barnehagane i adventstida. I tillegg har kyrkjelydspedagogen opplegget Bibelsporet i seks skular vinteren 2024/2025. Dette inneber 4 timar undervisning der innhaldet i heile Bibelen blir gjennomgått.

Alle skulane i Fusa sokn hadde skulegudstenester i kyrkjene i adventstida 2025.

H. Medarbeidarskap

Tal uløna medarbeidarar ligg på omlag 120 personar. Kyrkje er noko me er saman og gjer saman, men me ser at det er større og større utfordring å få frivillige medarbeidarar som kan gå inn å ta leiaransvar, og å binde seg over tid! Medarbeidarskap har over tid vore eit av satsingsområda til soknerådet. Det er registrert om lag 35 frivillige medarbeidarar som på rundgang tok del i førebuing og gjennomføring av gudstenester i soknet. Andre frivillige deltek i trusopplæringsarbeidet og i barne- og ungdomsarbeidet generelt, tillegg kjem frivillige som tek del i det diakonale arbeidet, familiemix, komité- og utvalsarbeid, og anna arbeid som t.d. kakebaking.

Soknet freistar å ha jamleg fokus på alle frivilligemedarbeidarar. I 2025 vart desse

særskilde tiltaka for og saman med frivillige medarbeidarar gjennomført:

- Utdeling av Bibelleseplan
- Bønehelg august 2025

Utval

Soknerådet har oppnemnd 5 kyrkjeutval.

Kyrkjeutvala er ressursgrupper for kvar kyrkjekrins, og bidreg godt med m.a. ansvar for kyrkjekaffi, open kyrkje, kyrkjevert, praktisk arbeid elles. Alt utvalsarbeid er frivillige tenester.

I. Soknerådet sin økonomi

Årsmeldinga viser til budsjett og rekneskapsrapport for 2025. Fusa sokneråd er etter noko omstilling i 2025 på veg mot tilfredsstillande økonomi. Alle inntekter i soknet er basert på gåver, kollektar og eigeninnsats som t.d. sal av Fusakalenderen. Det er viktig for soknet å halda oppe fokuset på gjevarteneste og at det er kyrkjelyden i lag som held aktivitetsnivået på eit høgt nivå gjennom gåver og engasjement.

Fusingane har tradisjon for å bidra godt; også i 2025:

- Elevstipend Tabor inkl. to konkrete studentar: kr. 24.000,-
- Brannskadde born i Sør-Etiopia: ca kr. 163.000,- (inkl. overskott frå Bruktbuo)
- Diakoni i Fusa inkl. matgåve: kr. 160.000,-
- Kirkens Nødhjelp: kr. 55.000,-
- Eksterne offer: kr. 114.000,-
- Offer til kyrkjelydsarbeidet: kr. 36.000,-
- Offer til barne- og u.arbeidet: kr. 70.000,-
- Gåver til barne- og u.arbeidet: kr. 227.000,- inkl. overskot frå Bruktbuo
- Kyrkjeblad: kr. 48.000,-

J. Organisering og endringar

Administrativt og personalmessig har det vore nokre endringar i 2025: Norunn Rød Markhus avslutta i august si 20 år lange teneste i Fusa sokn. Kristin Almås gjekk i august inn i vikariat

som Dagleg leiar i Fusa frivilligsentral under Linda Reigstad Matland sin foreldrepermisjon.

Fusa sokneråd

Fusa sokneråd i perioden 2024-2027 er:

Sigbjørn Sundfjord (leiar), Britt Mari Gjerde (nestleiar), Toril Hjartåker Hauge, Lars Erik Dalland, Inger-Lise Prestegard, Øyvind Nordbø, Jan Ole Høiby Hansen, Hartvig Haugen. Varamedlemmer: Audny Elise Samnøy Stuen, Linda Frøyseth, Atle Næss, Samson L. Øpstad, Engel Magne Berge. Fusa sokneråd sine representantar i Bjørnafjorden kyrkjelege fellesråd er Lars Erik Dalland og Øyvind Nordbø. Lars Erik var i 2025 leiar i fellesrådet.



K. Fusa sokn framover - Strategi

Gud til ære – fusingar til gagn!

Det er det me er kalla til som kyrkjelyd. Strukturar, bygg og organisering er berre reiskapar i Guds rike. Gjennom åra vert reiskapar utslitne, utdaterte, fornya, utvikla og utskifta. Alt etter kva som er tenleg til føremålet.

Under årsmøtet 2025 starta soknet eit strategiarbeid som skal munne ut i eit nytt stretegidokument for soknet for dei komande åra. I denne prosessen har årsmøtet, soknemedlemmer, sokneråd og stab vore delaktige.

Me ynskjer å styrka alle deler av arbeidet vårt, men føresetnader rundt oss er i endring og det er nausynt for soknet å ta nokre viktige prioriteringar i tida som kjem. I dette må me be om at vårt arbeid og det me legg til rette for i Fusa byggjer Guds rike og at Gud sjølv går framom og leier oss.

Guds ord til oss er det same uansett og kallet vårt er å følgja han og gå ut med evangeliet.

Eikelandsosen 03.03.2026

Hans Einar Markhus

Dagleg leiar Fusa sokn

Sigbjørn Sundfjord

Leiar Fusa sokneråd